

Was merr so babbelt

Honnes?
Ei was dann?
Deesde heit emol ...
Naa.
Was naa?
Naa!
Ich habb doch noch garnit gesacht, was ...
Naa!
Jetzt loss mich doch erst emol saache ...
Naa! Du host „deesde“ gesacht, dess longt merr.
Jetzt heert sich awwer alles uff.
Du heerst merr uff. Ich habb aach emol was vor.
Was hosden du vor?
Ich muss derr nit alles uff die Nas binne.
Saach emol, was issen heit metter los?
Nix. Ich det nor gern aach emol mache was ich will.
Als ob du nit immer mache dets was du willst.
Ich? Immer mache was ich will? Doo muss ich lache.
Dann lach.
Naa. Ich habb nix ze lache.
Ach loss merr doch moi Ruh. Doo mach ichs selbst.
So? Was willsden mache?
Dess binn ich grad dir uff die Nas.
Was machsden mett dere Laader?
Ferr was brauch merr e Laader? Zum Hochkrawwele.
Du waaßt, dass ich dess nit gern seh.
Was siehsde nit gern?
Dass du uff die Laader krawwelst. Liewer krawwel ich.
Dann krawwel du. Ich hallse fest
Was willsden mache?
De Meisekasje ausbutze. Ess werdd Zeit deferr.
Den ahle Kasje? Dess kimmt nit in Fraach.
Ei warum dann nit? - dess mache merr doch jed Johr.
Dissjohr awwer nit. Der iss kabutt, doo ziehts enoi.
Woher waaßden du dess, du bist doch koo Meisje?
Die Dier vom Kasje schließt nimmi, doo ziehts dene.
Unn was willsde mache?
Enn neie kaafe, wasden sunnst?
Unn dess hosde heit vorgehabt?
Dess habb ich immer noch vor. Unn was wollst du?
Dass merr de Meisekasje sauwer mache.
Unn warum hosde dess nit gleich gesacht?
Du host mich joo nit zu Wort kumme losse.
Ich habb dich nit ... doo lach ich awwer.

Dann lach.

Ha-ha. Isses so gut?

Ja. Honnes? – „deesde“ heersde nit gern, gell?

Naa. Weil doo kimmt immer was hinnenooch.

Dess stimmt.

Woher waaßden du dess?

Ei weil du mol zu mir gesacht host: Deesde mich heirate?

Eiern Honnes